

# INUIT ATAQATIGIIT INATSISARTUNI



UPA2022/161

Ulloq 23-03-2022

Knud Mathiassen

## **Uunga siunnersuut: Nappaatit tunillaassortut akiorniarlugit iliuutsit pillugit Inatsisartut inatsisaat.**

(Peqqissutsimut Naalakkersuisoq)

Naalakkersuisut sinnerlugit Nappaatit tunillaassortut akiorniarlugit iliuutsit pillugit Inatsisartut inatsisissaattut siunnersuut saqqummiunneqartumut imatut Inuit Ataqtigiinniit oqaaseqarfigissavarput.

Siunnersuut misissuataarnerani siunnersuummi Naalakkersuisut sinnerlugit saqqummiunneqartumi siunniussatut pingaarnertut taasariaqartoq ersarissaq tassaavoq innuttaasut inuiaqtigiillu nappaatinut navianartunut tuniluuttunullu illersornissaat.

Taamatullu ilungersunartumik nalaataqarnitsinni aammalu aaliangersimasumik pisoqartillugu iliuusissat inatsisitigut toqqammaviit periarfissinneqartut inuiaqtigiit tamatta illesorniarluta atortariaqartartut ersarissarneqarputtaaq ilaatigut ulluinnarni inuunitsinni sunniuteqartumik killilersuisariaqarnermik allatigullu iliuuseqartoqartariaqartarluni.

Taamatut nalaataqarnerput nunarsuarmi nappaammik tuniluuttoqarnerani malussarfigisimaqaarput ulluinnarni inuunitsinnut aningaasaqarnikkullu sunniutai annertummata.

Naalakkersuisup toqqammavilersornermi nappaatit sukksasuumik tuniluuttarsimasut 1950-ikkunniit 1970-ikkut tikillugit assersuusiorfigalugit saqqummiussaqaarfigai.

# INUIT ATAQATIGIIT INATSIARTUNI



Taamatullu siunnersuut saqqummiunneqartoq arlaatigut assigusumik nappaatinik tuniluuttoqartillugu qanoq iliuseqarsinnaanissamut periarfissaqarnissaa qulakkeerniarlugu siunnersuut ullutsinnut naleqqussarlugu saqqummiunneqarluni.

Siunnersuummitaaq ersarissarneqarpoq pisariaqartitsineq naapertorlugu killilersuinerit, inerteqqusiinerit arlaatigullu iliuseqarnerit atulersinneqarnerini innuttaasut pisinnaatitaaffii taamatullu tuniluuttumik nappaalanersuaqarnerup atuunnerani inuit ataasiakkaat taamatullu inuiaqatigiit ataatsimut isigalugit illersoneqarnissaat tamarmik naligiimmik oqimaaqatigiissinneqarniartarnissaat pingaaruteqartoq aamma saqqummiunneqarpoq.

Siunnersuut qanoq iliuseqarnissamik periuseqarnissamillu ersarissaaffiusoq taamatullu inuit pisinnaatitaaffiinik nalimmassaanissamik innarliinngitsumik naleqqussarneqarsimanera naammagisimaarlutigu taamatut oqaaseqarluta Inuit Ataqtigiinniit ilaqutariinnermut Peqqissutsimullu ataatsimiititaliami suliassanngortipparput.